

- प्रधानमंत्री नरेंद्र मोदी कह्यो-साल 2025 राष्ट्रीय सुरक्षा, खेलां अर वैज्ञानिक नवाचार रा हलका मांय कामयाबियां रो साल रह्यो
- आकाशवाणी ऊं मन की बात कार्यक्रम मांय प्रधानमंत्री कह्यो-ऑपरेशन सिंदूर हर भारतीय सारू गर्व रो प्रतीक
- अरावली पर्वतमाला मामला ने ले र सुप्रीम कोर्ट मांय काले सुणवाई व्हेलां
- प्रदेश मांय कमती रा तापमान मांय गिरावट रे कारण ठण्ड रो असर बध्यो
- सिरोही जिला रा माउंटआबू मांय काले ऊं शरद महोत्सव री सुरुआत

000

प्रधानमंत्री नरेंद्र मोदी कह्यो है के भारत ई साल राष्ट्रीय सुरक्षा, खेल अर विज्ञान ऊं ले र दुनिया रा सब ऊं मोटा मंचा ताई हर ठौड़ आप री मजबूत छाप छोड़ी हैं आकाशवाणी ऊं मन की बात कार्यक्रम मांय प्रधानमंत्री कह्यो के साल 2025 हर भारतीय ने मान दिरावण वाळा केई क्षण दिया हैं श्री मोदी कह्यो के 'ऑपरेशन सिंदूर' ई साल हर भारतीय सारू गर्व रो प्रतीक बण ग्यो

श्री मोदी राष्ट्रीय गीत वंदे मातरम री 150 वीं सालगिरह माथे लोगां रा उमाव अर जज्बा री सराहवना करीं वणा कह्यो के हैशटैग वंदेमातरम एक सौ पचास रे साथै लोगां आप रा संदेश अर सुझाव साझा कर्या, जो सरावण जोग हैं प्रधानमंत्री कह्यो के खेल सारू ई साल 2025 याद राखण जोग रियो श्री मोदी विश्व चैंपियनशिप मांय केई तमगा जीतण वाळा पैरा-एथलीटा री ई सराहवना करीं

प्रधानमंत्री कह्यो के ई साल विज्ञान समेत केई हलकां मांय भारत अनेको कामयाबी हासिल करीं श्री मोदी कह्यो के प्रयागराज महाकुंभ पूरी दुनिया ने चौका दियां देश री युवा शक्ति रो जिक्रो करता प्रधानमंत्री 'विकसित भारत युवा नेता संवाद' रा दूजा संस्करण रे बेगा ई करण ने ई कह्यो

प्रधानमंत्री कह्यो के देश नुवी आशावां अर नुवां संकल्पां रे साथै 2026 मांय जावण सारू तैयार हैं श्री मोदी आशा जतायी के साल 2026 विकसित भारत रा लगस ने हासिल करण कानी एक महाताऊ कामयाबी साबित व्हेलां वणा सगळां ने साल 2026 री शुभकामनावां दीं प्रदेश मांय ई मन की बात कार्यक्रम ने ले र घणों उमाव निजर आयो जयपुर मांय आप रा रहवास माथे मुख्यमंत्री भजन लाल शर्मा रा विचार सुण्यां श्री शर्मा कह्यो के प्रधानमंत्री मन की बात कार्यक्रम री मार्फत देश री प्रगति रो सफर आपा रे साथै साझा करे हैं ओ कार्यक्रम देश री कामयाबी माथे मान करण रो मौको है, जो आपा ने बरोबर आगे बधण री सीख देवे हैं ई दौरान विधायक डॉ. गोपाल शर्मा, पैली रा विधायक रामलाल शर्मा समेत केई जननुमाइन्दा अर लोग ई मौजूद रियां पाली, भीलवाड़ा समेत दूजा जिला मांय ई मन की बात कार्यक्रम ने भाजपा कार्यकर्तावां अर लोगां उमाव रे साथै सुण्यां

000

केंद्रीय विज्ञान अर प्रौद्योगिकी मंत्री डॉ. जितेंद्र सिंह भारत ने बदलण सारू परमाणु ऊर्जा रा सतत दोहन अर विकास-शांति विधेयक ने नरेंद्र मोदी सरकार रा सब ऊं मोटा विज्ञान सुधारा मांय एक बताया हैं आज नुवी दिल्ली मांय मीडियां साथे बतळ मांय श्री सिंह कह्यो के साल 2014 मांय भारत रो परमाणु ऊर्जा बूतो कोई 4 दशमलव 4 गीगावाट ऊं बध ने आज कोई 8 दशमलव 7 गीगावाट व्हे ग्यो हैं वणा कह्यो के शांति विधेयक भारत रा परमाणु हलका मांय एक ऐतिहासिक सुधार हैं

000

सुप्रीम कोर्ट अरावली पहाड़ियां री परिभाषा मांय अजेई व्हेया बदलाव ऊं पैदा चिन्ता माथे खुद संज्ञान लियो हैं मुख्य न्यायाधीश जस्टिस सूर्यकांत, न्यायमूर्ति जे.के. माहेश्वरी अर न्यायमूर्ति ए.जी. मसीह री अवकाशकालीन पीठ काले ई मामला माथे सुणवाई करेलां सुप्रीम कोर्ट रो दखल अरावली पहाड़ियां री पाछी परिभाषा ने ले र व्हेया जनविरोध रे पाछे आयो हैं ई बीचे मुख्यमंत्री भजनलाल शर्मा साफ कर्यो है के अरावली पर्वतमाला राजस्थान री अमूल्य प्राकृतिक धरोहर है अर इण रा स्वरूप रे साथै किणी तरह री छेडछाड नी होवण दी जायेलां मुख्यमंत्री वन, पर्यावरण खान अर पुलिस री भेळी टीमां बणा र खास अभियान चलावण रा निर्देश

दिया हैं वठे ई भीलवाडा अर पाली समेत केई ठौड़ां ई मामला ने ले र कांग्रेस कानी ऊँ जनजागरण रैली राखी ज्यी हैं

000

लोकसभा अध्यक्ष ओम बिरला कह्यो के भारत वसुधैव कुटुम्बकम् रा विचार ऊँ ई विश्व गुरु बनेलां वणा आज कोटा मांय एक सामाजिक कार्यक्रम मांय बोलता आ बात कही के आपा री नौजवान पीढ़ी ने बत्ती शिक्षित अर मजबूत बणे इण तरह री कोशिश व्हेणी चाहिजें आज भारत रा नौजवान दुनिया रा हल हलकां मांय आप रो दबदबो कायम राख्या हैं

.....
श्रीगंगानगर जिला रा सरहदी नग्गी गांव मांय साल 1971 रा युद्ध री याद मांय 'नग्गी डे' मणायी ज्यों ई मौके सेना कानी ऊँ चिकित्सा शिविर लगायी ज्यों शिविर मांय सेना रा डॉक्टर गांवा वाळां री मुफ्त जांच अर ईलाज कर्यों गांव मांय हथियारां री नुमाईश लगायी ज्यों ई मौके व्हा कार्यक्रम मांय स्कूली पढ़ेसरां अर मद्रास रेजिमेंट रा जवानां मोवणा सांस्कृतिक कार्यक्रम प्रस्तुत कर्यां वठे ई जवानां मलखम्ब खेल ने दरसाया, गढ़वाल राइफल्स खुखरी डांस, 21वीं सिख रेजिमेंट रा जवानां गतका मार्शल आर्ट री प्रस्तुतियां दीं नग्गी डे माथे सेना कानी ऊँ 1971 रा युद्ध मांय मदद करण वाळा गांवा वाळां रा पिरवारजणां रो ई सनमान करी ज्यों

000

सिरोही जिला रा माउंट आबू मांय काले ऊँ शरद महोत्सव री सरूआत व्हेलां तीन दिन ताई चालण वाळा ई महोत्सव मांय न्यारा-न्यारा सांस्कृतिक कार्यक्रम अर हौड़ां ई व्हेलां म्हारा सिरोही खबरनवीस बतायो के महोत्सव ने ले र सैलाणियां रे साथै वठां रा लोगां मांय ई उमाव रो माहोल हैं

.....
उत्तराद हवा अर पहाड़ी हलका मांय व्ही बर्फबारी रे कारण प्रदेश मांय ठण्ड रो असर बध ग्यो हैं आज राज्य मांय सब ऊँ कम 2 दशमलव 1 डिग्री सेल्सियस कमती रो तापमान सीकर रा फतेहपुर मांय दर्ज व्ह्यों करौली मांय 2 दशमलव 4, पाली मांय 3 दशमलव 6, दौसा मांय 3 दशमलव 9, बारां रा अंता मांय 5 दशमलव 1, चूरू मांय 5 दशमलव 4 डिग्री सेल्सियस कमती रो तापमान दर्ज व्ह्यों वठे ई आज भीलवाडा मांय संवारा बादळ छाया रहवण ऊँ दिन रा तापमान मांय थोड़ी बढवार व्हीं मौसम केन्द्र जयपुर मुजब काले मौसम साफ रहवेलां नुवा आथूणी विक्षोभ रे सक्रिय होवण ऊँ 31 दिसम्बर अर एक जनवरी ने राज्य रा बीकानेर संभाग अर शेखावाटी हलका रा कुछ भागां मांय हल्की मावट व्हेवण रा आसार हैं वठे ई राज्य रो उत्तराद अर आथूणी भागां मांय जनवरी रा पहला हफ्ता मांय घणो कोहरो छायो रह सके हैं कोहरा रे कारण केई रेलगाडियां री आवाजाही माथे असर व्हे रह्यो हैं रेलवे जातरियां ने सलाह दी है के वे टेशन माथे जावण ऊँ पैला रेल री मौजूदा स्थिति जाण लेवें

000

सरसों अनुसंधान केंद्र कानी ऊँ भरतपुर रा नदबई मांय किसान संगोष्ठी रो आयोजन करी ज्यों संगोष्ठी मांय जैविक खाद काम मांय लेवण सारू काश्तकारां ने जागरूक करी ज्यां संगोष्ठी मांय नुवी दिल्ली रा भारतीय कृषि अनुसंधान संस्थान रा वैज्ञानिक डॉ. संजय सिंह काश्तकारां ने बतायो के जैविक खाद ने काम मांय ले र माटी री संरचना मांय सुधार जल धारण बूता मांय बढवार, पोषक तत्व उपयोग बूता मांय इजाफो होवे हैं वणा कह्यो के सरसो आधारित फसल प्रणालियां मांय टिकाऊ निपज अर मृदा स्वास्थ्य सुधार सारू जैविक खाद चोखी उपयोगी हैं

000

जालौर जिला रा बागरा मांय आयुर्वेद क्षार सूत्र शल्य चिकित्सा शिविर लगायी ज्यों आयुर्वेद महकमां अर राष्ट्रीय आयुष मिशन कानी ऊँ लगायी ज्या ई दस दिन रा शिविर मांय आज चौथे दिन 1 हजार 463 मरीजां रा ईलाज करी ज्यों पंचकर्म चिकित्सा प्रभारी डॉ. सांवलाराम बतायो के 58 रोगियां रो पंचकर्म चिकित्सा पद्धति ऊँ ईलाज करी ज्यों

000